

## BARATZEZAINZA INTERNETEN ERE

Baratzezaintza ekologikoari buruzko informazioa formatu mota askotan aurki dezakegu: liburuetan, ikastaroetan, tailerretan, gure partzela ondoko baratze-kidearengan, ... Baina, telefono mugikorrek eta tableten erabilera hainbeste zabaldu direnetik, ia denok mundu digitalera hurbildu gara, eta argi dago gero eta informazio gehiago bilatzen dugula Interneten bidez. Eta, jakina, baratzezaintzari buruzko informazioa ere bilatzen dugu!

Horrexegatik, gero eta gehiago dira baratzezaintzan espezializatutako YouTubeko kanalak, webguneak, blogak, e.a. Hainbeste dira gai honi buruz Interneten aurki ditzakegu proposamenak, hurrengo zerrenda sortu dugula YouTubeko webguneak eta kanal interesgarrienak izan daitezkeenekin, lagungarria izango zaizuelakoan.


Nahiz eta gure lurraldetik hurbilagoko proposamen gehiago eskaini nahiko genituzkeen, egia da zerrenda honetako webgune eta kanal gehienak Huescako, Asturiasko, Valentziako, Galiziako edo are urrutiagoko baratzezainen proposamenak direla. Dena den, eskaintzen dizkiguten informazioak gure lurraldeko baldintza klimatikoetara egokituz, ziur guztiongandik ere ikas dezakegula!



<https://www.ekogunea.eu/ekogunea/baratze-parke-sarea/3-8/>

Berria bazara Baratze Parke Sarean eta oraindik gure webgunea ezagutzen ez baduzu, bertan sartzerako gonbidatzen zaitugu: Sareko Baratze Parke bakoitzaren informazioa aurkituko duzu, Gipuzkoako hainbat udalerritan martxan dauden beste autokontsumorako baratzeen informazioa, baratzezaintzaren inguruko informazio tekniko eta Sareak eskaintzen dituen zerbitzuei buruzko informazioa.

Webgunean euskaraz eta gaztelaniaz nabigatu dezakezu.



<https://www.bizibaratzea.eus/>

Jakoba Errekondo (Usurbil, 1961) paisajista, agronomo eta dibulgatzaile ezagunaren webgunea da *Bizi Baratzea*. Euskarazko webgune honetan, Jakobak ilargi-zikloetan oinarritutako agenda bat proposatzen digu, astero baratzean, basoan, lorategian, e.a. egin beharreko lanak zehaztuz. Landareen fitxa teknikoaren zerrenda luzea, galderen txokoa eta beste eduki interesgarri asko eskaintzen ditu. Oso webgune dinamikoa da, eta edukiak etengabe eguneratzen dira.

<https://educacionambiental.pamplona.es/eu/hezkuntza-komunitatea/eskola-baratze-ekologikoen/formakuntza-bideoak-eskola-baratzeak/>



Lotura honetan, Iruñeko Udaleko Ingurumen Hezkuntzako Departamentuak baratzean urtean zehar egin beharreko lanak erakusten dituzten bideo praktikoak aurkezten ditu. Eskolako baratzeetara zuzenduta dagoen arren, informazioa era guztietako baratzeetarako ere baliagarria da. Bideoak euskaraz edo gaztelaniaz ikus ditzakezu.

<https://huertofamiliar.com/>



Pepe Ballarin da *El Huerto Familiar* izeneko webgunearen aita. Webgune honetan baratzeen eta etxeko lorategien inguruko gaiak azaltzen dira, eremu horietako lanei buruzko informazio ugari aurki dezakegu.

<https://www.youtube.com/@Elhuertofamiliar/featured>



Webguneaz gain, Pepe Ballarinek YouTuben ere badu kanal propio bat, *El Huerto Familiar* izenekoa ere, ia 400.000 harpidedun dituena. Kanal honetan zintzilikatutako bideoen bidez eta Huescako probintziako bere baratzetik, Pepék 100 barazki eta landare espezie ezberdin baino gehiago nola landu azaltzen digu, modu erraz eta ulergarrian, beste eduki askoren artean.

<https://www.youtube.com/user/iNoT1980>



*La Huertina de Toni* izena du Toni Jardonen YouTubeko kanalak. Toni, baratzezain eta informatikaria da eta Bolguesen (Asturias) duen baratzean grabatutako bideo ugari eskaintzen dizkigu. Bi milioi harpidedun inguru ditu kanal honek eta bertan zintzilikatutako bideoetan norberaren elikagaiak modu ekologiko eta organikoan lantzen erakusten digu, ongarri eta erremedio organikoak prestatzeko informazioa eskaini ere, hazitegiak pausoz pauso egiten ditu, e.a.

<https://www.youtube.com/channel/UCM-s05N1EzwjPQvRscHOCgw>



*El Terregal de Ray* YouTubeko beste kanal bat da, 500.000 harpidedun inguru dituena. Kanalean zintzilikatutako bideoetan, Raimundo Lucio Vazquezek, formazioz albaitaria, Mexikon duen baratze jarduerak partekatzen ditu: lurreen, bankaletan edo loreontzitan nola hazi barazki organikoak, autokontsumorako baratzezaintza ekologikorako gidak eta tutorialak, zizare-humusa eta beste ongarri naturalak nola prestatu, izurriteak eta gaixotasunak kontrolatzeko praktika egokiak, e.a. topa dezakegu bere bideoetan.

<https://www.youtube.com/user/Dezkon85>



*La huerta de Iván* milioi bat harpidedun baino gehiago dituen YouTubeko beste kanal bat da. Ivan Vazquezek Turisen (Valentzia) duen baratzean oinarrituta bideo pila eskaintzen dizkigu. Baratze organikoa egiten irakasten digu, baita etxeko sendagaiak egiten edota baratzean ohikoak diren arazoak modu jasangarrian konpontzen. Bere hitzetan, bai kanaleko edukiak bai blogean argitaratzen dituenak ere esperientzian eta praktikarekin ikasitakoan oinarritzen omen dira.

<https://www.youtube.com/user/gferrise>



*Cosas del jardín 2* milioi harpidedun baino gehiago dituen YouTubeko kanala da, Argentinatik iristen zaiguna (Kontuz egutegiak!... Argentina hego hemisferioan baitago). Gabrielelek, kanalaren sortzailea, bere kanalaren helburua baratze bat lantzen hasi nahi dutenentzat inspirazio iturri izatea dela dio, eta horrexegatik, bideoetan bere baratze esperientziak, trikimailuak eta aholkuak partekatzen ditu, ondo ateratzen zaizkionak eta bere hanka sartzeak ere.

<https://www.youtube.com/user/soengaliza>




*Diario dun neno labrego* YouTubeko beste kanal bat da, 30.000 harpidedun inguru dituena.

Vilamarín udalerrian (Ourense) duen baratze organikotik, Juanjo Rodriguezek bere ezagutza eta esperientzia partekatzen ditu bideo pila bitartez. Bere bideoak eduki multzoetan antolatuta ditu, eta honek gai zehatz bati buruz informazioa bilatzea errazten digu.

---

<https://www.youtube.com/@miracebo/featured>



*Miracebo* 20.000 harpidedun inguru dituen YouTubeko kanal bat da. Kanal honetan, Miguel Ruizek, lanbidez maisua izandakoa, norberaren elikagaiak ekoitzi nahi dituztenei ezagutza transmititzeko grinarekin jarraitzen du. Eta horrexegatik baratzezaintzazko bideo pila zintzilikatuta ditu, Suancesen (Cantabria) duen El Prao izeneko txokoan grabatutakoak.

---